



PROXECTO DE ORDE POLA QUE SE DETERMINA O HORARIO XERAL DE APERTURA E PECHE DOS ESTABLECEMENTOS ABERTOS AO PÚBLICO E DE INICIO E FINALIZACIÓN DOS ESPECTÁCULOS PÚBLICOS E DAS ACTIVIDADES RECREATIVAS NA COMUNIDADE AUTÓNOMA DE GALICIA

A Comunidade Autónoma de Galicia ten competencia exclusiva en materia de espectáculos públicos, consonte o establecido na Lei orgánica 16/1995, do 27 de decembro, de transferencia de competencias á Comunidade Autónoma de Galicia, que mantén a reserva para o Estado das competencias relativas á seguridade pública e a facultade de ditar normas que regulen os espectáculos taurinos. A materia de espectáculos públicos abrangue as actividades recreativas, tal e como sinalou o Tribunal Constitucional no Auto 46/2001, do 27 de febreiro.

Para o pleno exercicio desta competencia, o Real decreto 1640/1996, do 5 de xullo, regula o traspaso de funcións e servizos da Administración do Estado á Comunidade Autónoma de Galicia na dita materia, e mediante o Decreto 336/1996, do 13 de setembro, asumíronse as funcións e os servizos transferidos.

Con base na devandita atribución competencial, promulgouse a Lei 10/2017, do 27 de decembro, de espectáculos públicos e actividades recreativas de Galicia. O artigo 4.c) desta norma legal establece que lle corresponde á consellería competente en materia de espectáculos públicos e actividades recreativas determinar o horario xeral de apertura e peche dos establecementos abertos ao público e de inicio e finalización dos espectáculos públicos e das actividades recreativas. Así mesmo, o artigo 5.f) dispón que lles corresponde aos concellos autorizar as ampliacións ou reducións sobre o horario xeral, atendendo aos criterios, os supostos e as circunstancias que, de ser o caso, figuren na orde de horarios prevista no artigo 17.

O artigo 17 do texto legal citado establece, no seu número 1, que mediante orde da persoa titular da consellería competente na materia, e logo do informe da Comisión de Espectáculos Públicos e Actividades Recreativas de Galicia,



determinarase o horario xeral de apertura e peche dos establecementos abertos ao público e de inicio e finalización dos espectáculos públicos e as actividades recreativas. E engade, no seu número 2, que a orde que determine os horarios de apertura e peche dos establecementos abertos ao público e de inicio e finalización dos espectáculos públicos ou das actividades recreativas poderá establecer os criterios, os supostos e as circunstancias que permitan aos concellos autorizar, de xeito motivado, ampliacións ou reducións sobre o horario xeral.

A consellería competente en materia de espectáculos públicos e actividades recreativas na Comunidade Autónoma de Galicia é a Vicepresidencia e Consellería de Presidencia, Administracións Públicas e Xustiza.

A clasificación, denominación e numeración dos espectáculos públicos, das actividades recreativas e dos establecementos abertos ao público axústase ao disposto no Decreto , polo que se aproba o Catálogo de espectáculos públicos, actividades recreativas e establecementos abertos ao público da Comunidade Autónoma de Galicia e se establecen determinadas disposicións xerais de aplicación na materia.

Por todo o anterior,

DISPOÑO:

Artigo 1. *Obxecto*

Esta orde ten por obxecto a determinación do horario xeral de apertura e peche dos establecementos abertos ao público e de inicio e finalización dos espectáculos públicos e das actividades recreativas.

Artigo 2. *Ámbito de aplicación*



Esta orde será de aplicación a todo tipo de espectáculos públicos e actividades recreativas e aos establecementos ou espazos abertos ao público onde se celebren, de conformidade coas tipoloxías establecidas no Decreto , polo que se aproba o Catálogo de espectáculos públicos, actividades recreativas e establecementos abertos ao público da Comunidade Autónoma de Galicia e se establecen determinadas disposicións xerais de aplicación na materia.

Artigo 3. Horario xeral

A) Normas xerais

1. Os espectáculos públicos e as actividades recreativas unicamente poderán desenvolverse dentro do horario que se fixa nesta norma.

2. Todos os horarios, tanto xerais como específicos ou especiais, sen excepción, terán a consideración de horarios máximos, polo que en ningún caso poderán ser excedidos.

3. Entenderase por horario de apertura o momento a partir do cal se permitirá o acceso ás persoas usuarias do establecemento aberto ao público ou ás persoas asistentes ao espectáculo público ou actividade recreativa.

4. A partir da hora de peche non se permitirá o acceso de ningunha persoa como usuaria ou asistente, respectivamente, ao establecemento ou ao espectáculo ou actividade, e non se ofrecerá ou servirá consumición ningunha. Sen prexuízo das disposicións que ao respecto poidan ser adoptadas, consonte a normativa especial en materia de protección medioambiental, deberán, de ser o caso, quedar fóra de funcionamento, a partir do devandito momento, a ambientación musical, as máquinas e demais aparellos de xogo, vídeo ou semellantes, as sinais luminosas, localizadas no exterior do establecemento ou do espectáculo ou actividade, e cesar as actuacións que se celebren, con independencia das tarefas propias de recollida e limpeza que se desenvolvan por parte do persoal.



5. Á hora de peche establecida, acenderanse as luces xerais do establecemento, quedando as portas de entrada e saída expeditas e abertas para que se poida producir o completo e ordenado desaloxo. Sen prexuízo dos límites que veñan impostos pola normativa sectorial ou de seguridade e orde pública, o desaloxo dos establecementos cuxa capacidade estea fixada en 350 persoas ou máis, practicarase no prazo máximo de 45 minutos, desde a hora de peche. Nos demais casos, o período en que debe realizarse o desaloxo será, como máximo, de 30 minutos.

6. Será de aplicación ás instalacións eventuais, portátiles ou desmontables o mesmo réxime de horario que o fixado para as instalacións permanentes, en función do espectáculo ou actividade que se estea a desenvolver.

7. En todo caso e sen prexuízo do horario xeral de apertura e peche que se determina nesta orde, para todos os establecementos regulados nela, entre o seu peche e a apertura seguinte, deberá transcorrer un período mínimo de 4 horas.

B) Horario de peche

O horario xeral de peche dos establecementos abertos ao público e o horario xeral de finalización dos espectáculos públicos e das actividades recreativas é o seguinte:

I. ESPECTÁCULOS PÚBLICOS

I.1. Espectáculos cinematográficos	- 2.00 horas
I.2. Espectáculos teatrais e musicais	- 3.30 horas
I.3. Espectáculos taurinos	- 22.00 horas
I.4. Espectáculos circenses	- 1.00 horas
I.5. Espectáculos deportivos	- 2.00 horas
I.6. Espectáculos feirais e de exhibición	- 1.00 horas
I.7. Espectáculos pirotécnicos	- 1.00 horas



II. ACTIVIDADES RECREATIVAS

II.1. Actividades culturais e sociais	- 3.00 horas
II.2. Actividades deportivas	- 2.00 horas
II.3. Actividades de ocio e entretemento	- 2.00 horas
II.4. Atraccións recreativas	- 2.00 horas
II.5. Festas e verbenas populares	- 3.30 horas
II.6. Xogos de sorte, envite ou azar	- 4.00 horas
II.7. Actividades de restauración	- 3.30 horas
II.8. Actividades zoolóxicas, botánicas e xeolóxicas	- 00.00 horas

III. ESTABLECEMENTOS ABERTOS AO PÚBLICO

III.1. Establecementos de espectáculos públicos

III.1.1. Cines	- 2.00 horas
III.1.2. Teatros	- 2.00 horas
III.1.3. Auditorios	- 2.00 horas
III.1.4. Circos	- 1.00 horas
III.1.5. Prazas de touros	- 22.00 horas
III.1.6. Establecementos de espectáculos deportivos	- 2.00 horas
III.1.7. Recintos feirais	- 1.00 horas

III.2. Establecementos de actividades recreativas

III.2.1. Establecementos de xogo

III.2.1.1. Casinos	- 4.00 horas
III.2.1.2. Bingos	- 4.00 horas
III.2.1.3. Salóns de xogo	- 2.30 horas
III.2.1.4. Tendas de apostas	- 2.30 horas



III.2.2. Establecementos para actividades deportivas

III.2.2.1. Estadios deportivos:	- 2.00 horas
III.2.2.2. Pavillóns deportivos:	- 2.00 horas
III.2.2.3. Recintos deportivos:	- 2.00 horas
III.2.2.4. Pistas de patinaxe:	- 2.00 horas
III.2.2.5. Ximnasios:	- 2.00 horas
III.2.2.6. Piscinas de competición:	- 2.00 horas
III.2.2.7. Piscinas recreativas de uso colectivo:	- 2.00 horas

III.2.3. Establecementos para atraccións e xogos recreativos

III.2.3.1. Parques de atraccións e temáticos:	2.00 horas
III.2.3.2. Parques acuáticos:	2.00 horas
III.2.3.3. Salóns recreativos:	00.00 horas
III.2.3.4. Parques multiocio:	00.00 horas

III.2.4. Establecementos para actividades culturais e sociais

III.2.4.1. Museos:	00.00 horas
III.2.4.2. Bibliotecas:	4.00 horas
III.2.4.3. Salas de conferencias:	1.00 horas
III.2.4.4. Salas polivalentes:	2.00 horas
III.2.4.5. Salas de concertos:	4.00 horas

III.2.5. Establecementos de restauración

III.2.5.1. Restaurantes:	2.00 horas
III.2.5.1.1. Salóns de banquetes:	3.30 horas
III.2.5.2. Cafeterías:	2.30 horas
III.2.5.3. Bares:	2.30 horas



III.2.6. Establecementos para actividades zoolóxicas,
botánicas e xeolóxicas 00.00 horas

III.2.7. Establecementos de ocio e entretemento

III.2.7.1. Salas de festas:	5.30 horas
III.2.7.2. Discotecas:	5.30 horas
III.2.7.3. Pubs:	4.00 horas
III.2.7.4. Cafés-espectáculo:	4.00 horas
III.2.7.5. Furanchos:	2.00 horas

III.2.8. Centros de ocio infantil 22.00 horas

C) Supostos especiais

Fins de semana

O horario de peche dos establecementos abertos ao público aos que se refire esta orde ampliarase con carácter xeral:

- Media hora as noites que van do venres ao sábado e do sábado ao domingo, así como as noites das vésperas dos días festivos.

D) Horario de apertura

1. Os establecementos abertos ao público incluídos no apartado III.2.7. Establecementos de ocio e entretemento, do Decreto , non poderán abrir antes das 12.00 horas da mañá.



2. O resto de establecementos abertos ao público así como os espectáculos públicos e as actividades recreativas, non poderán abrir antes das 6.00 horas da mañá.

Artigo 4. Modificacións de horarios

1. De acordo co artigo 17.2 da Lei 10/2017, do 27 de decembro, de espectáculos públicos e actividades recreativas de Galicia, os horarios xerais poderán ser ampliados ou reducidos, nos supostos e consonte o procedemento que se establecen nos artigos 5, 6 e 7 desta orde.

2. Corresponderalles aos respectivos concellos, segundo o disposto no artigo 5.f) da Lei 10/2017, do 27 de decembro, a ampliación ou redución dos horarios xerais. Os acordos que se diten nesta materia esgotarán a vía administrativa.

Artigo 5. Ampliacións de horarios

1. Ao abeiro do disposto no artigo 5.f) da Lei 10/2017, do 27 de decembro, os concellos poderán ampliar para todo o seu termo municipal ou para zonas concretas deste, os horarios xerais de peche dos establecementos abertos ao público durante a celebración das festas e verbenas populares, do Entroido, da Semana Santa e do Nadal, facendo compatible, en todo caso, o seu desenvolvemento coa aplicación das normas vixentes en materia de contaminación acústica. Estas ampliacións de horarios deberán ser comunicadas á Delegación do Goberno para os efectos oportunos e cunha antelación mínima de sete días naturais.

2. Os concellos, mediante acordo do órgano competente, establecerán o número máximo de días naturais ao ano en que poderán ampliar os horarios de peche dos establecementos abertos ao público, dos espectáculos públicos e das actividades recreativas.



3. Para os efectos desta orde, entenderase por Entroido o período comprendido entre o Xoves de Entroido e o Mércores de Cinza, ambos incluídos, por Semana Santa o período comprendido entre o Domingo de Ramos e o Domingo de Resurrección, ambos incluídos, e por Nadal o período comprendido entre o 22 de decembro e o 6 de xaneiro, ambos incluídos.

4. En todos os supostos anteriores, as ampliacións de horario non poderán superar, en ningún caso, en 2 horas os horarios xerais de peche dos establecementos abertos ao público.

5. Os concellos tamén poderán ampliar o horario xeral de determinados espectáculos musicais de características específicas ou excepcionais ata un máximo de 2 horas.

Artigo 6. Reducións de horarios

1. Ao abeiro do disposto no artigo 5.f) da Lei 10/2017, do 27 de decembro, os concellos poderán reducir para todo o seu termo municipal ou para zonas concretas deste, o horario xeral dos establecementos abertos ao públicos ou dos espectáculos públicos e das actividades recreativas regulados nesta orde polas causas que de seguido se relacionan e de conformidade co procedemento que se determina.

2. Serán causas de redución do horario a localización dos establecementos ou dos espectáculos e actividades en áreas ou zonas de alta concentración destes ou as que se atopen cualificadas e delimitadas como residenciais, medioambientais protexidas ou saturadas e cando a actividade que neles se desenvolva impida o dereito ao descanso da veciñanza.

3. Procedemento para a redución do horario

3.1. Nas zonas ou áreas previstas no número 2 deste artigo e cando concorran as circunstancias mencionadas nel, poderase reducir o horario xeral de peche dos



establecementos abertos ao público ou dos espectáculos públicos e das actividades recreativas en 2 horas.

3.2. Nestes supostos, durante a tramitación do expediente e con anterioridade á proposta de resolución polos concellos, solicitaranse os informes técnicos precisos para acreditar as devanditas circunstancias así como tamén a información veciñal correspondente. Así mesmo, darase trámite de vista do expediente á persoa titular do establecemento e á persoa organizadora do espectáculo ou da actividade, de ser caso, para os efectos de que poida formular as alegacións pertinentes nun prazo de 15 días.

3.3. O concello resolverá o expediente de xeito motivado nun prazo máximo de 3 meses, facendo constar de forma expresa o período de vixencia da redución acordada. Transcorrido este, rexerá de novo o horario xeral.

Artigo 7. Apertura de portas dos establecementos abertos ao público, dos espectáculos públicos e das actividades recreativas

1. Todos os establecementos abertos ao públicos, os espectáculos públicos e as actividades recreativas comezarán á hora anunciada e durarán o tempo previsto nos carteis ou, de ser o caso, na correspondente autorización.

2. Sen prexuízo do establecido na normativa sectorial de aplicación, os recintos destinados a albergar espectáculos públicos ou actividades recreativas estarán abertos ao público coa antelación seguinte:

- Ata 1.000 persoas de capacidade, 30 minutos antes.
- De 1.000 persoas ata 5.000 persoas de capacidade, 45 minutos antes.
- De 5.000 persoas ata 25.000 persoas de capacidade, 1 hora antes.
- De máis de 25.000 persoas de capacidade, 1 hora e 30 minutos antes.



Artigo 8. Réxime especial de horarios para determinadas actividades de restauración

1. Poderán acollerse a un réxime especial de horarios as actividades de restauración situadas nos seguintes lugares:

- a) Áreas de servizo de estradas, aeroportos, portos, estacións de ferrocarril e estacións de autobuses.
- b) Establecementos de hospedaxe.
- c) Polígonos industriais.
- d) Centros sanitarios e tanatorios.

2. Nestes supostos, poderán ter, como máximo, o horario fixado para o propio establecemento onde se desenvolva a actividade, sempre que as devanditas actividades de restauración vaian destinadas a satisfacer as necesidades das persoas profesionais e usuarias do establecemento e que neles se ofrezan exclusivamente bebidas e alimentos para o consumo inmediato, sen que, en ningún caso, poidan dispoñer de espazos específicos para a celebración de bailes ou medios de reprodución de música de ningún tipo.

Artigo 9. Réxime especial de horarios de peche de determinados establecementos abertos ao público

1. Os concellos que teñan obtido a declaración de zona de gran afluencia turística para os efectos de horarios comerciais, de acordo coa vixente normativa de comercio interior de Galicia, nos termos e cos límites temporais establecidos na correspondente declaración, poderán autorizar, logo da petición das persoas titulares das actividades de restauración, ocio e entretemento, horarios especiais, que supoñan unha ampliación dos horarios xerais de peche, para os devanditos establecementos.

Nos procedementos de autorización que os concellos establezan para o efecto, garantírase o outorgamento dun trámite de audiencia ás persoas veciñas lindeiras cos



establecementos para os que se solicita o horario especial e ás asociacións veciñais e de persoas consumidoras e usuarias do concello afectado.

Nestes supostos, as ampliacións de horario non poderán superar, en ningún caso, en 2 horas os horarios xerais de peche dos establecementos abertos ao público.

2. Os concellos poderán autorizar, logo da petición dos organismos ou entidades titulares da actividade, a ampliación dos horarios xerais de peche das bibliotecas en máis de 2 horas, cando concorran circunstancias excepcionais que resulten acreditadas.

O concello resolverá o expediente de xeito motivado, facendo constar de forma expresa o período de vixencia da ampliación acordada. Transcorrido este, reixerá de novo o horario xeral.

3. Así mesmo, os concellos poderán autorizar, logo da petición dos organismos ou entidades titulares da actividade, a ampliación dos horarios xerais de peche dos establecementos para actividades deportivas en máis de 2 horas, cando concorran circunstancias excepcionais que resulten acreditadas.

O concello resolverá o expediente de xeito motivado, facendo constar de forma expresa o período de vixencia da ampliación acordada. Transcorrido este, reixerá de novo o horario xeral.

Disposición derogatoria. *Derrogación normativa*

Queda derogada a Orde do 16 de xuño de 2005 pola que se determinan os horarios de apertura e peche de espectáculos e establecementos públicos na Comunidade Autónoma de Galicia.



Disposición derradeira. *Entrada en vigor*

Esta orde producirá efectos desde o mesmo día da entrada en vigor do Decreto ----
-----, polo que se aproba o Catálogo de espectáculos públicos, actividades
recreativas e establecementos abertos ao público da Comunidade Autónoma de
Galicia e se establecen determinadas disposicións xerais de aplicación na materia.